

Universitäts- und Landesbibliothek Tirol

Franz Schweyger's Chronik der Stadt Hall

Schweyger, Franz

Innsbruck, 1867

Eroberung der claussn Ernburg von der landtschafft

1546 der claussn Erzburg zue ziehen mit sambt andern gsandten aus den stettn und griechtn im obern und undern Inntal. Die unsern seind am andern tag hinauff zu der claussn gsandt worden. Mer ist an disem tag zu Hall nachmittag ankumen graff Fridrich und sein sun von Fürstberg auch ain freyherr von Geroltzegg, ain junger Truckhsäs, des bischoffs von Augspurg brueder, all mit 50 graisigen pfärdten und guettn reittern, mit irem harnisch wol geputzt. Seind über nacht zue Hall pliben, den zweiten tag auff dem Innstram der kays. mjt. zue gfaren.

Am 18. August umb 2 nachmittag ist zu Hall ankumen der cardinal Ferness mit 800 graisigen pfärdten, der merer tail graffn, mit sambt 2 herzogn Salmano, auch 2 bischoffn und vil römischen wälschn adl. Hat auch 32 teütsch trabanten, wol klaidt auff teütsch ghabt, auch 10 welsch edlknaben auf hübschen pfärdtn und vil maulösln mit güettern gladen. Hat auch trefflich vil silbergschier mit gefiert und praucht. Der maist tail seines volks ist am andern tag über landt auff Wasserburg zu grittn und sein da gewart. Der cardinal Ferness ist zu Hall pliben 2 tag mit sambt dem postn adl, ist nachmals am 20. August in aller frue auff dem Innstram mit 9 scheffn auff Wasserburg zue gfaren. Das gröst scheff hat alain güetter und raisstruchnen gefiert. Der cardinal ist im pfannhauss zu Haussegg glegen mit seinem hoffgsindt. Ist ain junger herr pey 28 jaren. Mer an disem tag durch Hall gerittn ain junger graff von Zollern mit 10 graisigen pfärdtn, wol gerist, der kays. mjt. zue.

Wagenross.

Am 22. August seind durch Hall gangen 600 wagenross, gemustert zu Innsprugg, dem kays. mjt.leger zue, auf Inglatat.

Wälsch kriegsvolkh.

Am 26. und 30. August send zu Hall auff dem Innstram hinab gfaren 3 grosse scheff mit vil volkhs wälschm, auch andern güettern, darunder der kays. mjt. profantmaister Franciscus de Thuarto.

Eroberung der claussn Erzburg von der landtschafft.

Am 5. Septembris ist die claussn und gschloss Erzburg von der landtschafft der grafschafft Tyrol wider erobert worden (mit

hilff gottes). Walthauser Fieger von Nörlingen hat das gschloss 1546 und claussn innen ghabt in namen des schmacaltischen pundts. Ist haimlichn abgewichn pey der nacht. Aber das gschloss ist von der landtschafft hefftig erschossen worden. Im volgettn am 7. Octobris send unsere purger, 60 man, widerumb anhaims kumen von der claussn.

Endt des schmalcaltischen kriegs und pundts.

Am 6. Novembris ist widerumb zu Hall ankumen von der kays. mjt. aus dem feltleger der cardinal Ferness, ist über nacht zu Hall gelegen mit 600 graisigen pfärdtn. Ist nachvolgents auff Rom zue.

Dan wie sich der landtgraff von Hessn sambt seinem pundts-verwandtn gelegert hat pey Ingolstat, enthalb der Thonaw, wie vormals pemelt ist worden, wider die kayserl. mjt. und seinem kriegsvolkh, hat pemelter landtgraff hefftig in die schantz und geleger kays. mjt. geschossen und des etliche tag getriben. Die kays. mjt. hat dergleichen auch hinwider gethan mit schiessn und scharmitzlen. Wie aber Maximilian, graff zu Peurn aus dem Niderlandt der kays. mjt. zu hilff ist kumen mit 12 fennl fuessvolkh und geraisige pfärdt 3700, hat pemelter landtgraff seine leger an lassen zintten und ist im rauch mit seinem kriegshör von dannen verruckt in der flucht auff Gerolfingen zu, nachmals auff Neuburg, fortan weiter. Die kays. mjt. hat im nachgeruckt.

Summa kays. mjt. kriegsvolkh vor Ingolstat:

Teütscher pferdt	10000
Wälscher pferdt	20030
Teütscher zu fuess fänle 74	
Spannier	7820
Wälscher zu fuess	12000

Umb Martini pis nach weinachten ist seer ain truckner, kalter winter gewesen, under tags schön warm wötter.

Das korn hat goltn 26 kr. und das selbig gnug.

Absterben der römischen kinigin und landtsfürstin.

Anno domini 1547 am 20. Februarii ist zu Hall begangen worden mit gotzdiensten und klag das absterben von diser welt der röm. kgl. frauen Anna, des römischen kinig Ferdinand eelicher